

Ex Aedibus Vaticanis, die 12 Aprilis 1962

N. 81101

Exc.me atque Ill.me Domine,

Egregie sentientis animi tui indicium Beatissimo Patri nuper edidisti, cum Ipsi omni cum reverentia humanissimas misisti litteras, ut, nomine quoque sodalium Collegii Ciceronianis studiis provehendis, maximas gratiarum actiones exhiberes, ob solemniter editam Apostolicam Constitutionem, quae, a verbis "Veterum Sapientia" incipiens, ad linguae Latinae honorem et cultum respicit.

Puto equidem, fore ut sive tu, sive isti docti viri haud parum gaudeatis, cum noveritis Christi Vicario observantiae vestrae testimonia peraccepta sane ac periucunda contigisse, siquidem inde iterum iterumque agnovit, quo animo, quo studio, qua denique voluntate antiquam semperque vividam Latii linguam, humanitatis cultus vinculum praesidiumque, certatim prosequamini atque colatis.

Quoniam vero grata urbanitate in Beatissimi Patris illius diei memoriam reduxisti, quo frequentes viros, Ciceronianum Convantum celebrantes, coram admisit eosque allocutus est, scito id Summum sacrorum Antistitem sincera afficere laetitia: Qui vobis paterna laude iisdem verbis gratulatur "de praeclaris studiis, in quibus acriter et diligenter versamini", atque animum

---

Exc.mo et Ill.mo Domino  
D.no IULIO ANDREOTTI  
Collegii Ciceronianis Studiis  
provehendis Praesidi

ROMAM

per me addit ad ea servanda et colenda "semper mansura et firmissima bona, ob quae conditi sumus, sine quibus recte et feliciter vivere non possumus" (Discorsi Messaggi Colloqui, I, pp. 234-5).

Quae omnia candida et felicia vobis percupiens, Sanctitas Sua tibi ceterisque sodalibus praeclari istius Collegii supernorum bonorum affluentiam precatur, atque expetitam Apostolicam Benedictionem, propensae Suae voluntatis pignus, peramanter impertit.

Id vero tecum communicans, ea qua par est existimatione me profiteor

Tibi  
addictissimum

M. J. Card. Cicognani